

Lauxsae Gou

Boux hawj gou ceiq hoj lumz haenx, dwg boux lauxsae mehmbwk mwh gou doeg siujhag haenx, coh de heuhguh Cai Yinzcih.

Dauqngex hwnjdaeu, bande Cai Yinzcih lauxsae aiq miz cib betgouj bi. Combak baihgvas de miz naed reindaem hung lumj naed ngaenzdih ndeu nei. Gou ndaejgeiq bouxvunz de hozraez youh gyaunde.

De coengzlaiz mbouj ndaq dou moeb dou gvaq. Dandan miz baez ndeu, geu bien sonsaw de lumj yaek fad roengzdaeu nei, gou aeu rinbanj ma dangi, geu bien cix mbaeumbaeu fad youq gwnz rinbanj haenx, gyoengq doengzhag raen le riuhaha, de caemh riu lo. Ceh da lwgnyez iq gvai dangqmaz, bande gou cix rox lo, de

gyaez gyoengqdou, mbouj miz saek di sim naeuz yaek moeb dou.

Bingzseiz roengzdangz le, de son dou diuq foux, gou lij ndaejgeiq raixcaix, de hawj gou cang guh lwgmbwk diuq foux gienh saeh neix.

Youq ngoenzgyaj seiz, de daiq dou bae ranz de caeuq laeng baengzyou de. Youq ndaw suen baengzyou de, de hawj dou bae cazyawj duzrwi, caemh dwg youq bande, gou roxnaj le duz rwiuengz, caemhcaiq ciuhvunz baez daih'it ndaej gwn dangzrwi.

De gyaez sei, caiqlij haengj aeu gij diuh eu fwen daeu son dou doeg sei. Daengz banneix lo gou lij ndaejgeiq gij diuh de doeg sei, lij ndaej boih okdaeu:

Mbwn goeb youq gwnz haij,
Raemx laeg daiq ruz gyauh bae,
Gyae dwk yawj mbouj raen bya,
Dinmbwn danmiz fwj,
Hix yawj mbouj raen faex,
Gwnz raemx haenx cijmiz
roeghaijoh.....

Banneix ngvanh daeu, de doiq gou nebdawz caeuq gyaezmaj vwnzyoz miz haujai yingyangj mizik! Lumj cungj lauxsae neix, dou baenzlawz mbouj haengj de, baenzlawz mbouj nyienh caen'gyawj de ne? Dou mbatmbat raen de le cungj doq conx bae homz de. De sijsaw seiz, dou cungj dingdingh yawj de sij, daengz gij yiengh gaem bit de cungj aeu hag liux bae.

(Vei Vei raiz/Veiz Munlingz hoiz)



Vayilanz Hau

Ndaw hagdangz seizcin lumj benq haijva ronghsag nei, valanz saekaeuj, vadauz saekhoengzmaeq, labmoiz saekhenj hai ndaej cingq hoengh, gou cix gag gyaez vayilanz hau cinghseuq gyaunde haenx.

Gyae'gyae muenghyawj, vayilanz hau caenx rim nyefaex, go yilanz lumj longz geu buhsa hausag ndeu nei. Rumzsaeq ci gvaq, vayilanz hau saenqdoengh ndangdaej, lumj duzroegbeggap hau iet fwed, diuq foux yebyeb. Duzrwi nyouq daengz heiqhom cix daeu hix nyaengq dwk youq ndaw va ndonj bae ndonj dauq, hawj vayilanz haumbapmbap dem le geij faen lingzdoengh.

Daengz gyawj baez yawj, moix duj vayilanz hau cungj gag miz daegsaek. Mizmbangj cienzbouh hai hoengh, lumj dahsau sangreux gyaunde; mizmbangj limqva ngamq hai song sam limq, lumj dahsau iq najnyaenq cingq yaeng'yaeng muengh seiqgyaiq; mizmbangj dwg lupva, bongz lumj yaek dek nei. Danghnaeuz dawz gij dangqnaj yawjraen neix beijguh fuk veh ndeu, dinfwngz canghdajveh saedcaih ak gvaq vunz.

Yawj fuk dozveh gyaunde dangqnaj, gou lumjdwg hix baenz duj vayilanz hau ndeu lo.

Gamjsouh gij ndit raeurub, caeuq baenz duj baenz duj va gwnz nye itheij riengz rumz diuq foux. Rumz gvaq le, gou hix dingz roengzdaeu dingdingh ndwn dwk. Duz rwi ndeu mbin daengz henz ndang gou, lumjdwg lwnh gou dangzrwi de aeu haenx geijlai van.....

Singhiz haj mwh cuengqhag, vayilanz hau rim faex cingq hai hoengh, hoeng singhiz it daeu daengz hagdangz baez yawj, vayilanz hau gwnz go cungj loenq liux lo. Yawj ngafaex ndoqndatndat, gou nanzgvaq dangqmaz. Seizneix, gou myaegraen di heumoq ndeu—O, yilanz hau maj mbaw lo! Gij mbaw oiqwdwd

haenx, iqetet, dwggyaez raixcaix. Dingzlai doenghgo cungjdwg maj mbaw gonq hai va laeng, hoeng yilanz dwg hai va gonq maj mbaw laeng. Neix dwg vih gijmaz ne? Gou cungj naemj mbouj doeng.

Gou cam gohyoz lauxsae, gohyoz lauxsae riu dwk han naeuz: "Gij va caeuq gij mbaw doenghgo bingzciengz dwg youq seizcou bigonq couh maj baenz lo, cijdwg deng suek youq ndaw ngaz. Daengz seizcin le, mbwn bienq raeuj, gyoengqde couh maj okdaeu lo." Lauxsae daengx yaep ndeu, laebdaeb gangj: "Yilanz hau cix mbouj doengz, mbwn haemq nit de hix did ndaej lupva, baez haeuj seizcin mbwn yienznaeuz lij nit, hoeng gij raeuj haenx gaenq muen-cuk de fatmaj." Hoeng mbaw nyod de majhung aeu mbwn engq raeuj, ngamq haeuj seizcin mbwn lij nit mbouj miz banhfap hawj de majhung, vihneix gij mbaw de ciuqgaeuq "gaenzgaeq" dwk. Caj daengz mbwn raeuj, nyodngaz couh maj okdaeu lo.

Vayilanz hau iqetet cangcoux gij gyaunde caeuq saenzgeiz geq mbouj liux. Danghnaeuz mwngz hix lumj gou nei maj vayilanz hau, mwh seizcin va hai, mboujfuengz daeu hagdangz dou caeuq gou guhdoih yawj vayilanz hau gyaunde ba!

(Lij Yizcinz raiz/Nungz Cinfung hoiz)



Aen Ndaundeiq Haengj Bang Vunz

Doengxhaemh, rumz liengz-sisi. Fwjndaem gyuemuemz doh mbwn, goemq ndaej gwnz dieg laepyubyub, hoeng geh fwjndaem daengh ok benq ronghgim ndeu lwenqbyangbyang, cek fwjndaem baenz gofaex baenz dujva, gyaunde dahraix. Ronghndwen loq raen loq mbouj raen, lumj baengzsei goemq gwnz namh nei, daengh sejrongh ok geh fwjndaem daeu.

Youq doiqnaj, giz caz rum, raen geh rum miz gijmaz ronghrikrik. Byaij bae gyawj yawjyawj, geh rum douh miz aen ndaundeiq ndeu. Laxlawz, ronghndwen daxmeh yaek gaujniemh aen ndaundeiq neix, soengq de daeu gwnz namh.

Aen ndaundeiq neix ngamq daengz gwnz namh, yawj gijmaz cungj raen ndeyawj, de yawjyawj yienghneix, youh lumhlumh yienghhaenx. Ndaundeiq bungzdaengz gyoengq moed nyaengq ndeu, de cam: "Vei, moed iq! Sou nyaengq gijmaz ne?" Duzmoed iq naeuz: "Ndaundeiq ha! Dou cingq beuj gijgwn, hoeng byaij roen loeng fueng lo, mbouj rox baenzlawz guh lo!"

Ndaundeiq gag haibak naeuz: "Gou rox fat rongh, gou bang sou ra roen ma ranz!"

"Gyo' mbaic mwngz lo!" Duzmoed doenghsim naeuz.

Soengq duzmoed iq daengz ranz le, ndaundeiq dauqma ndaw caz rum, ndaw hoz naemj: Ronghndwen daxmeh gaujniemh gou yiengh maz ne? Seizneix, ndaundeiq fwt dingqny i duzdaek daeggo heuh. Laxlawz dwg duzdaek daegnuengx manz lai, guhcaemz daengz gyanghwnz cungj mbouj rox dauq ranz, daeggo cingq ra de ne!

Ndaundeiq gag haibak naeuz: "Gou rox fat rongh, gou ndaej bang mwngz ra raen daegnuengx."

Doeklaeng ra raen duzdaek daegnuengx la! De aiq dwg guhcaemz baeg lo, youq ndaw caz rum ninzdaek bae. Ndaundeiq soengq beixnuengx duzdaek daengz ranz liux.

Ndaundeiq miz di baeg lo, naeuz ra giz yietnaiq yaep ndeu.

Seizneix, song gaiq ga de byaij mbouj maenh, fouz youq gwnz namh, mbin daengz gyang mbwn, bienqbaenz gwnzmbwn aen ndaundeiq ceiq rongh ceiq rongh de.

Ronghndwen daxmeh doiq de naeuz: "Lwg ha, mwngz haengj bang vunz couh dwg gienh saeh gaujniemh ceiq hung, gou vih mwngz roxnyinh miznaj."

Ndaundeiq dingq le, riu-nyumnyum.

(Cwnggh Sih' wz raiz/ Veiz Caijcinh hoiz)